



州府元龜

卷之六  
至七



13  
849  
201





43  
849  
201



册府元龜

淮南李嗣京叅閱

西極文翔鳳訂正

豫章黃國琦較釋

學較部 九

注釋

夫六藝之文所以明天道正人倫學者之所宗百王之取則者也仲尼既沒微言遂絕而聖門達者傳受彌廣歷聘諸國奮為人師亦復敷繹與義為之訓傳秦并天下乃有坑焚之酷編簡散逸大義益乖自漢

册府元龜 學較部 卷之六十五



之表章六經尊立學較方領矩步之士亦稍稍而出  
故其演暢經旨發明典誥廣章句之學極討論之致  
師資或異傳受不同各自名家咸用垂世至乃述其  
訓詁以發揮隱贖推厥義例以錯綜條貫著撰之美  
藹乎前聞逮乎百家之衆制歷代之載籍爲之注釋  
以輔其說者并紀焉

卜商魏人爲魏文侯師傅周易二卷

漢孔鮒爲陳勝博士撰論語義疏三卷

周王孫雒陽人作易傳二篇

史不載官下倣此

服先齊人

一云服生

著易傳

彭宣字子佩淮陽人爲大司馬長平侯作易傳

戴宗字子平沛人爲少府作易傳

魯申公爲詩訓故而齊轅固燕韓生皆爲之傳或取

春秋采雜說咸非其本義與不得已魯最爲近之

與不

不得已者言不得已也三家皆不得其真而魯最近也

三家皆列於學官徵爲大

中大夫

韓嬰燕人也孝文時爲博士景帝時至嘗山太傅嬰  
推詩人之意而作外傳數萬言其語頗與齊魯間殊  
然歸一也淮南貢生授之燕趙間言詩者繇韓生韓  
生亦以易授人推易意而爲之傳燕趙間好詩故其



易微惟韓氏自傳之

賈誼為梁王傳修春秋左氏傳誼為左氏傳訓故

丁寬為梁孝王將軍距靈楚號丁將軍作易說三萬

言訓詁舉大誼而已誼謂經之旨趣也今小章句是也

費直字長翁東萊人也治易為郎至單父令長於卦

筮亡章句徒以彖象繫辭十篇文言解說上下經隋志

載直注周易四卷

董仲舒為江都相少治春秋所著皆明經術之意及

上疏條教凡百二十三篇而說春秋事得失文舉玉

杯繁露清明竹林之屬皆其所著書名也復數十篇十餘萬

言皆傳於後世隋志載仲舒撰春秋決事十卷

夏侯勝為太子太傅受詔撰尚書論語說解其意者今意疏也

后倉通詩書為博士至少府說禮數萬言號曰后氏

曲臺記曲臺殿在未央宮

孟喜字長卿為曲臺署長丞相掾為易章句十卷

張禹為成帝師以帝難數對已問經為論語章句獻

之後至丞相安昌侯

劉向考易說以為諸易家說後至中壘較尉

歐陽高為博士作尚書章句

京房為魏郡太守撰周易章句十卷一云十卷周易錯



八卷

趙曠撰詩道微十一篇

孔安國為臨淮太守傳古文尚書十三卷今字尚書十四卷傳古文孝經一卷

侯苞撰韓詩翼要十卷

嚴彭祖為太子太傅撰春秋左氏圖七卷又注春秋公羊傳十二卷

尹經始為諫議大夫長樂戶將為穀梁章句十五卷孔光注孝經一卷至太傅卒

樊光為中散大夫注爾雅三卷

侯苞注揚子法言

嚴遵字君平蜀郡人注老子二卷又注老子指歸一十卷

河上公注老子四篇又云作節解二卷

安丘望之為長陵三老為老子章句二卷

想余注老子二卷一云張魯或云劉表魯字公旗為鎮南將軍犍為郡文學卒史臣舍人注爾雅二卷

劉歆注爾雅三卷

與李巡注正同疑非歆注

後為京兆尹

後漢鄭眾為大司農傳毛詩及左氏條例章句又傳周官禮記論語孝經



何休精研六經世儒無及者太傅陳蕃辟之蕃敗休廢錮乃作春秋公羊解詁

博物志曰何休注公羊云何氏學有不解者或答曰

休謙辭受學於師乃宣此義不出於已此言為允也 覃思不闕門十有七年又

注訓孝經論語風角七分皆經緯典謨不與守文同

說又以春秋駁漢事六百餘條妙得公羊本意休善

歷算與其師博士羊弼追述李育意以難二傳作公

羊墨守

言公羊之義不可攻如墨翟之守城也

左氏膏盲穀梁廢疾後

為諫議大夫

鄭玄隱修經業杜門不出時任城何休好公羊學遂

著公羊墨守左氏膏盲

說文曰盲隔也心下為膏喻左氏之疾不可為也 穀

梁廢疾玄乃發墨守鍼膏盲起廢疾休見而歎曰康

成入吾室操吾矛而伐我乎玄作毛詩箋周官注玄

本習小戴禮後以故經較之取其義長者故為鄭氏

學玄又注小戴所傳禮記四十九篇通為三禮焉玄

所注周易尚書毛詩儀禮禮記論語孝經尚書大傳

中候乾象歷又注天文七政論語魯禮禘祫義六藝

講論毛詩譜駁許慎五經異義答臨孝存周禮凡百

餘萬言玄質於辭訓通人頗譏其繁至於經傳洽熟

稱為純儒齊魯間宗之又注論語孔子弟子目錄一

卷又注孟子七卷又撰三禮音各一卷詔以大司農



徵不起

馬融字季長為南郡太守議郎作毛詩傳及為左氏三家異同之說注孝經論語詩易三禮尚書列女傳老子淮南子離騷

夏侯建字長卿勝從父兄子為博士議郎太守少傅師事勝及歐陽高左右采獲又從五經諸儒問與尚書相出入者牽引以次章句為小夏后氏學

賈逵字景伯左氏傳國語為之解詁五十一篇永平中上疏獻之明帝重其書寫藏祕館逵數為帝言古文尚書與經傳爾雅訓詁相應詔今撰歐陽大小夏

侯尚書古文同異逵集為三卷帝善之復令撰齊魯

韓詩與毛詩異同並作周官解詁

逵又於章帝時受詔列公羊穀梁不

如左氏四十事名曰左氏長義帝善之為侍中卒

注丹建武初為博士作易通論七篇世號注君通

應劭為表紹軍謀較尉集解漢書又注漢儀五卷

王逸順帝時為侍中著楚辭章句行於世

牟長少習歐陽尚書著尚書章句皆本之歐陽氏俗

號為牟氏章句為中散大夫卒

翟輔為將作大匠尤善圖緯著授神鉤命解詁十二

篇



張衡爲尚書著周官訓詁崔瑗以爲不能有異於諸儒也又欲繼孔子易說彖象殘缺者竟不能就

衛宏從大司空杜林受古文尚書爲作訓旨後爲議郎

謝曼卿善毛詩乃爲其訓平帝元始中公車徵說詩橋仁爲大鴻臚初從同郡戴德學著禮記章句四十九篇號曰橋君學

穎容字子嚴陳國長平人也初平中避亂荊州聚徒千餘人著春秋左氏條例五萬餘言劉表以爲武陵太守不起

謝該字文儀善明春秋左氏爲世名儒門徒數百人建安中河東人樂許條左氏疑滯數十事以問該皆爲通解之名爲謝氏釋行於世爲議郎卒

許慎以五經傳說臧否不同於是撰爲五經異義又注淮南子二十一卷再遷除波長卒

楊終著春秋外傳十二篇改定章句十五萬言徵拜郎中

景鸞字漢伯理齊詩施氏易兼授河雒圖緯作易說及詩解文句及作月令章句州郡辟命不就

程曾字秀升受業長安習嚴氏春秋積十餘年還家



講授會稽顧本等數百人嘗居門下著書百餘篇皆五經通難又作孟子章句為海西令卒

杜林為司空注蒼頡篇二卷

服虔字子慎少以清苦建志入太學受業有雅才善

著文論作春秋左氏傳解行之又以左氏傳駁何休

之所駁漢事六十條又撰左氏傳音一卷為九經太

守免

張正習韓詩作章句

許淑字惠卿為大中大夫注解左氏

鄭興將門人從劉歆講正大義歆美興才使撰條例

章句傳詔為大中大夫

孔嘉字山甫為大中大夫注解左氏

趙岐注孟子十四卷後為太常

王雱撰漢官解詁三卷達武中為新汲令

盧植作尚書章句三禮解詁官至尚書

荀暉字景文作易集解為太子中庶子

包咸字子良為大鴻臚為論語章句

宋衷字仲子南陽章陵人為荊州五等從事注易九

卷

周氏為論語章句



胡廣注漢官解詁三卷為太傅卒

荀爽著禮易傳詩傳尚書正經春秋條例又云注周

易十篇

又有荀爽九家集注十卷不知何人所集稱荀爽者以為王故也其序有荀爽京房馬融

鄭玄宋衷虞翻陸績姚信翟子玄子不詳何人為義易注內又有張氏朱氏竝不詳何人春秋公

羊傳問答八卷及辯讖并它所論敘題為新書為司

空

陳元為司空南閣祭酒撰左氏同異

延篤字叔堅受左氏於賈逵之孫伯升因而注之為

京兆尹後卒於家

蔡邕撰月令章句十二卷後為左中郎將

王玠為司徒掾撰春秋左氏達長議一卷

劉熙為安南太守撰禮詒法三卷釋名八卷

宋均撰孝經皇義一卷注詩緯十八卷注禮記默房

二卷注樂緯二卷注孝經鉤命決六卷注孝經援神

契七卷注論讖八卷後為河內太守

崔豹為尚書左丞集論語集義八卷

劉表為鎮南將軍荊州牧撰易章句五卷

一云注易十卷

高誘注呂氏春秋二十六卷淮南子二十一卷辟司

空掾除濮陽令

樊英著易章句世名樊氏學後為光祿大夫賜告歸



曹充傳慶氏禮建武中爲博士永平中後拜侍中作章句辯難於是遂有慶氏學

曹褒充之子也傳充慶氏禮作通義十二篇演經雜論百二十篇後爲侍中

魏王弼字輔嗣爲尚書郎好論儒道辭才逸辯注易及老子又作老子指畧及撰易畧一卷周易義一卷論語釋疑三卷

王朗字景興爲司徒著易春秋孝經周官傳及撰春秋左氏釋駁一卷

王肅字子雍年十八從宋忠讀太玄而更爲之解初

肅善賈馬之學而不好鄭氏承會同異爲尚書詩論語三禮左氏解及撰定父朗所作易傳皆別於學官及作周易春秋例毛詩禮記春秋二傳國語爾雅諸注隋書志載肅撰尚書駁議五卷又撰尚書義問三卷又解孝經一卷論語釋駁三卷及解孔子家語又注老子二卷又撰三禮音各一卷爲太常

董遇字季直爲侍中大司農注周易十卷又爲春秋左氏傳章句

周生烈字文逸燉煌人爲博士注集解左傳又解論語



陳羣字長文為司空解論語

鍾會撰周易盡神論一卷又撰周易無玄體論三卷及注老子二卷後為鎮西將軍

何晏撰周易私記二十卷周易講疏十三卷注孝經二卷注論語十卷五經大義五卷老子道德經二卷後為尚書

劉楨為太子文學撰毛詩義問九卷

王基字伯輿東萊人為荊州刺史撰毛詩駁一卷

肅中鄭義又注解左氏傳

康信為樂平太守撰春秋要一卷

徐凱為安平太守撰答春秋公羊論二卷

魏益為大長秋撰春秋三傳論十卷

蘇林字孝友為散騎嘗侍注孝經一卷

劉劭字孔才為光祿大夫注孝經二卷

孟子注老子二卷或云孟康字公休為中書監注老子二卷

孫炎以祕書監徵不起注儀禮二十九卷

注爾雅二卷音一卷

李仲欽梓潼人著左氏指歸

縻信字南山為樂平太守注穀梁十二卷



蜀杜瓊為太守字伯瑜少受學於任安注韓詩章句  
十餘萬言不教諸子內學無傳業者

蔣琬為大將軍錄尚書事譏喪服要義一卷

李譔為中散大夫右中郎將著古文易尚書毛詩三  
禮左氏傳太玄指歸皆依准賈馬異於鄭玄與王氏  
殊隔初不見其所述而意歸多同

譙周字允南入晉為散騎嘗侍不拜封陽城亭侯注  
論語十卷撰五經然否論五卷古文考二十五卷

蜀才不詳何人注周易十卷又注老子二卷

七志云  
是玉海

後人蜀李書云姓范名長生一名賢隱  
居青城山自號蜀才李雄以為丞相

尹濤注易六卷

臣生內解老子二卷

吳虞翻字仲翔初為後漢侍御史與少府孔融書並  
示以所著易注融答書曰聞建陵之理樂觀五子之  
治易乃知東南之美者非徒會稽之竹箭也又觀象  
雲物察細蘊原其禍福與神合契可謂探賾窮通者  
也翻又為老子論語國語訓註又註揚子太玄經十  
四卷

范望州字淑文為尚書郎作老子注訓三卷

程秉為太嘗著周易摘尚書駁論語弼凡三萬餘言



徐整為太常卿為毛詩譜三卷又撰孝經嘿注一卷  
 韋昭為侍中譏毛詩答雜問七卷又注春秋國語二  
 十二卷孝經解贊一卷辨釋名一卷漢書音義七卷  
 射慈字孝宗為中書侍郎譏喪服變除圖五卷禮記  
 音一卷

士燮字彥威為衛將軍注春秋經十一卷

唐固字世正為尚書僕射注春秋穀梁傳十三卷又  
 著春秋外傳國語二十一卷

劉毅為太尉譏尚書答

姚信字德祐吳興人為太常卿注易十卷

謝貞撰禮記音一卷

陸績為鬱林太守述易十三卷

陸機字元恪吳郡人為太子中庶子烏程令作毛詩

草木鳥獸蟲魚疏二卷

晉羊祜為征南大將軍解老子二卷

杜預為鎮南大將軍鎮荊州既立功之後從容無事  
 乃耽思經籍為春秋左氏經傳集解又參考眾家譜  
 第謂之釋例又作盟會圖春秋長曆備成一家之學  
 比老乃成當時論者謂預文義質直世人未之重惟  
 祕書監摯虞賞之曰左丘明本為春秋作傳而左傳



自以孤行釋例本為傳設而所發明何但左傳故亦

孤行

隋志載預傳春秋左氏傳二卷又撰音一卷

稽康為中散大夫撰春秋左氏音三卷

向秀字子奇河內懷人為散騎常侍清悟有遠識少為山濤所知雅好老莊之學莊周著內外數十篇歷世才士雖有觀者莫適論其旨統也秀為之隱解發明其趣振起玄風讀之者超然心悟莫不自足一時也又為易義

郭象字子玄為太傅主簿好老莊能清言先是注莊子者數十家莫能究其旨統向秀於舊注外而為解

義妙演奇致大暢玄風惟秋水至樂二篇未竟而秀卒秀子幼其義零落然頗有別本遷流象為人行薄以秀義不傳於世遂竊以為已注乃自注秋水至樂二篇又易馬蹄一篇其餘眾篇或點定文句而已其後秀義別本出故有向郭二莊其義一也

又注論語體畧二卷

劉實為太尉尤精三傳辨正公羊以為衛輒不應辭以王父命祭仲失為臣之節舉此二端以明臣子之體遂行於世撰春秋條例二十卷

王接為臨汾公相國學雖博通特精禮傳嘗謂左氏辭義贍富自是一家書不主為經發公羊附經立傳



經所不書傳不妄起於文為儉通經為長任城何休  
訓釋甚詳而黜周王魯大體乖舛且志通公羊而往  
往還為公羊病接乃更注公羊春秋多有新義  
表准字孝尼至給事中為易周官詩傳及論五經滯  
義聖人之微言并注喪服經

袁喬為益州刺史湘西侯博學有文才注論語及詩  
皆行於世

范甯以春秋穀梁氏未有善釋遂沉思積年為之集  
解其義精審為世所重既而徐邈復為之注世亦稱  
之又注古文尚書舜典一卷為豫章太守卒

鄭冲為散騎常侍與孫邕曹義荀顛何晏共集論語  
諸家訓注之善者記其姓名因從其義有不安者輒  
改易之名曰論語集解成奏之魏朝于今傳焉

于寶為散騎常侍領著作為春秋左氏義外傳注周  
易周官凡數十篇又撰周易問難二卷周易玄品二  
卷周易爻義一卷春秋左氏承傳義十五卷春秋序  
論三卷又為詩音

鄧粲為荊州別駕注老子行於世

虞溥為鄱陽內史注春秋經傳序

束皙為尚書郎才學博通著五經通論發既行於世



劉黃老劭之族子太元中爲尚書郎有義學注慎子老子並傳於世

魯勝字叔時代郡人也少有才操爲佐著作郎其著述爲世所稱遭亂遺失惟注墨辯存其序曰名者所以別同異明是非道義之門政化之準繩也孔子曰必也正名名不正則事不成墨子著書作辨經以立名本惠施公孫龍祖述其學以正刑名於世孟子非墨子其辯言正辭則與墨同苟卿莊周等皆非毀名家而不能易其論也必有形察莫如別色故有堅白之辯名必有分明分明莫如有無故有無序之辯是

有不是可有不可是名兩可同而有異異而有同是之謂同異至同無不同至異無不異是謂辯同異異同生是非是非生吉凶取辨於一吻而原極天下之汗隆名之至也自鄧析至秦時名家者世有篇籍率頗難知後學莫復傳習於今五百餘歲遂亡絕滅墨辯有上下經經各有說凡四篇與其書衆篇連第故獨存今引說在經各附其章疑者聞之又采其衆雜集爲刑名二篇畧解指歸以俟君子其或興微繼絕者亦有樂乎此也

李充爲大著作遷中書侍郎注尚書及周易旨六篇



釋莊論上下二篇注論語十卷

劉兆五辟公府三徵博士皆不就博學洽聞以春秋一經而三家殊途諸儒是非之議紛然互爲讎敵乃思三家之異合而通之周禮有調人之官作春秋調人七萬餘言皆論其首尾便大義無乖時有不合者舉長短以通之又爲春秋左氏解名曰全綜公羊穀梁解詁皆納經傳中朱書以別之又撰周易訓註以正動二體玄通其文凡所贊述百餘萬言

徐苗再徵博士不就作五經同異評

郭璞爲著作郎注釋爾雅別爲音義圖譜又注三蒼

方言穆天子傳山海經及楚辭子虛上林賦數十萬

言

汜毓奕世儒素召補太傅參軍不就合三傳爲之解

注撰春秋釋疑肉刑論凡所述造七萬言

徐邈爲驍騎將軍撰正五經音訓學者宗之所注穀

梁傳見重於時又撰楚辭音一卷莊子音一卷

蔡謨字道明領祕書監總應劭已來注班固漢書者

爲之集解又撰禮記音二卷

徐廣爲祕書監撰答禮問及毛詩背隱藏義二卷

虞喜累徵博士不就釋毛詩畧注孝經撰周官駁難



又注論語九卷新書詩張論語十卷

郭琦字公偉有雅量博學注穀梁京氏易百卷鄉人

王游等皆就琦學為佐著作郎

宋纖字令艾燉州人為張祚太子太傅明究經緯注

論語及為詩頌數萬言

孟整一云孟陋江夏人博學多通於三禮注論語行

於世徵撫軍參軍不就

虞諶為司空從事中郎將注莊子行於世

盈氏注論語十卷又注老子二卷

隣貞為太尉參軍注歸藏十三卷

黃穎為廣州儒林從事注周易十卷

王廣為驃騎將軍注周易三卷

張軌字士彥為涼州刺史謚武公撰易義

宜舒字幼驥為宜城令為易通知來藏往論

邢融裴藻許適楊藻四人不詳何人竝為易義

袁悅之字元禮為驃騎諮議參軍註繫辭及為易音

孫綽字興公為廷尉卿集註論語十卷

張瑀為著作郎注周易八卷 一云集解易十二卷

桓玄字敬道為後將軍荊州刺史注周易繫辭二卷

謝萬字萬石為西中郎將注周易繫辭一卷又注孝



經

韓伯字康伯為中郎太嘗注周易繫辭二卷

李軌為祠部中郎都亭侯撰周易音一卷春秋左氏

傳音三卷又撰春秋公羊音一卷又解小雅一卷注

楊子法言莊子音一卷周禮儀禮音各一卷禮記音

一卷

楊又字玄舒為司徒左長史撰周易卦序論一卷又

撰毛詩辨異三卷毛詩異義二卷毛詩雜義五卷

阮咸字仲容為散騎常侍撰易義

阮渾字長咸為中庶子撰易義

一云撰周易論二卷

顧夷為揚州從事撰難王輔嗣義一卷

李顥字長林為江夏太守撰周易卦象數旨二卷集

解尚書十一卷尚書新釋二卷

謝沉字行思為祠部郎中註尚書十五卷又註毛詩

二十卷釋義十卷

孔晁為五經博士撰尚書義問三卷又注春秋外傳

國語

江熙字太和為兗州別駕註毛詩二十卷又註論語

十卷

孫毓字休明為長沙太守撰毛詩異同評十卷評毛



詩鄭王肅三家異同而朋於王又為春秋左氏傳義  
註二十八卷禮記音一卷

陳統為徐州從事撰難孫毓申鄭毛詩評四卷又傳  
毛詩索隱二卷

殷中堪為荊州刺史撰毛詩雜議四卷  
孟氏註莊子十八卷

王楸納為燕王師註周官寧朔新書八卷禮記寧朔  
新書八卷

陳歆為司空長史撰周官禮異同評十三卷  
吳商為益壽令撰禮難十二卷

孔倫為廬陵太守撰集註喪服經傳一卷

張嗣注老子二卷

王愆期字門子為散騎嘗侍註春秋公羊經十三卷  
江惇字思俊累徵不就撰毛詩音又傳公羊音一卷

庾翼為安西將軍荊州刺史撰答春秋公羊釋論語  
一卷

徐乾字文祜為給事中注春秋穀梁傳十三卷

張靖為業邑太守注春秋穀梁傳十卷又箋穀梁廢  
疾  
荀勗為尚書令集解孝經一卷



袁敬仲為東陽太守集議孝經一卷

陽弘為給事中注孝經一卷

虞盤佐字弘猷高平人注孝經一卷

史云處士

孫氏注孝經一卷

殷仲文為東陽太守注孝經一卷

殷叔道為晉陽太守注孝經一卷

車武子為丹陽令注孝經一卷

崔豹字正熊為尚書左兵中郎注論語十卷

江鴻為兗州別駕集解論語

梁凱為國子博士註論語十卷

繆播為太弟中庶子撰論語旨序三卷

樂肇為尚書郎撰易義及論語釋疑十卷又撰論語

駁序二卷

庾亮為征西將軍開府儀同三司撰論語君子無所

爭一卷

陽方為高涼太守撰五經恂沉十卷

戴逵字安道為散騎常侍撰五經大義三卷又撰老

子音一卷

劉寶為安北將軍撰漢書駁義二卷

摯虞為太常卿註三輔決錄七卷



王尚述字君曾為江州刺史註老子二卷

程韶為郎中集解老子二卷

邯鄲氏註老子二卷

袁真字彥仁為西中郎將註老子二卷

普氏注老子二卷

孫登字仲山為尚書郎著老子道德經

張湛為中書侍郎註列子八卷

崔譔為議郎註莊子十卷

司馬彪字紹統為祕書監註莊子二十一卷

李願字景真為丞相參軍自號玄道子註莊子三十

卷

皇甫謐累徵不起註鬼谷子三卷

王廙字世將為荊州刺史註易十二卷

庾運字玄度為尚書撰易義 一云易注

應真字吉甫為散騎嘗侍為明易論

荀暉字景文為太子中庶子撰易義又云註易十卷

張輝字義元為侍中撰易義

王宏字正宗弼之兄為大司農撰易義

袁宏字彥伯為東陽太守註孝經

王濟字武子為河南尹撰易義



注釋

衛瓘字伯玉為太保撰易義又註論語八卷  
張馮字長明為司徒左長史註論語十卷又註老子  
三卷

杜育字方叔為國子祭酒撰易義  
楊瓚為司徒左長史撰易義

阮侃字德恕為河內太守撰詩音  
蔡氏孔氏不詳何所人並為詩音

陳銓註周禮喪服

曹晞字愛道辟安北諮議參軍不就撰禮記音二卷  
尹毅為國子助教撰禮記音一卷註論語十卷

范宣字宣子徵員外不起以講誦為業禮易論難皆  
行於世又撰禮記音一卷

聶氏作周禮音一卷 一云定鄭氏音出北王  
工南無此書不詳何人訂正

孔衍字舒元為廣陵相撰春秋穀梁傳集解十四卷  
註公羊十四卷

荀訥字世言為尚書左侍郎撰左氏音四卷集解穀  
梁十卷

高龍為河南太守註公羊十二卷

段肅註穀梁十二卷

徐整註孝經

學較部



劉遺民為柴桑令撰老子玄謙一卷

楊泓為給事中註孝經

庾氏註孝經

董景道字文博弘農人劉曜累徵不起明三禮禮義  
顛遵鄭氏著通論非駁雜諸儒演廣鄭音

冊府元龜

淮南李嗣京參閱

西極文翔鳳訂正

豫章黃國琦較釋

學較部

注釋第二

宋何偃為侍中素好談玄注莊子逍遙篇又撰毛詩  
輝一卷

卞伯玉為東陽太守注周易繫辭二卷

荀柔之潁陽人為奉朝請注周易繫辭二卷并為易



音

范歆為陳令撰周易義二卷

何謹之為中大夫撰周易疑通五卷

沈林撰周易義三卷

姜道盛為給事中注集釋尚書十一卷

一云注尚書

樂安王友撰伊訓說

孫暢之撰毛詩引辯一卷毛詩序義七卷五經雜義

六卷

雷次宗字仲倫以通直郎徵不起撰毛詩序義二卷

畧注喪服傳二卷

裴松之為大中大夫撰集注喪服經傳一卷注三國

志六十五卷

蔡超宗字希遠為丞相諮議參軍集注喪服經傳一

卷

庾蔚之字季隨為員外嘗侍撰喪服要記及略解儀

禮十卷

徐爰字季玉為大中大夫注周易繫辭為易音毛詩

音禮記音二卷三國志評三卷

雷肅之撰禮記義疏三卷

何始貞撰春秋左氏區別三十卷



注釋二

費沈為撫軍司馬撰喪服集議十卷注孝經一卷

何承天為廷尉卿撰禮論三百卷注孝經一卷

任預撰禮條牒十卷答問雜儀二卷

張略為司空撰論語疏八卷

裴駙注史記八十卷

徐野人為中散大夫撰史記音義十二卷

諸葛氏撰楚辭音一卷

周績之字道祖為詩序義

劉道拔為海豐令注周禮喪服

業遵字長儒為本朝禮儀禮十二卷

荀昶字茂祖為中書郎注孝經

孔澄之字仲淵為新安太守注論語一卷

王叔之字穆夜撰莊子義疏三卷

南齊沈麟士隱居教授著周易兩繫莊子內篇訓注

易經禮記春秋尚書論語孝經喪服老子要略數十

卷

司馬歙撰喪服經傳義疏五卷

虞願為廷尉著五經論問

顧歡字景怡或云字玄平為太學博士注王弼易二

繫又撰毛詩集解序義又作老子堂話四卷一云老



子義疏

徐伯珍東陽人積學十年究尋經史吳郡顧歡摘出尚書滯義伯珍訓答甚有條理儒者宗之後刺史豫章王辟從事不就

祖冲之爲長水較尉著老莊義釋論語孝經注九章造輟述數十篇

費元珪注周易九卷

劉瓛字珪爲步兵較尉撰周易乾坤義九卷又撰周易四德例一卷毛詩序義疏一卷毛詩次篇義一卷周易繫辭義數二卷

顧瑄撰尚書問一卷

明僧紹字承烈平原人國子博士徵不赴注繫辭爲易義及集解又注孝經

樓幼瑜撰喪服經傳義疏二卷

王玄載字彥暹爲光祿大夫注孝經一卷注老子道德經

虞遐爲員外郎注孝經

陸澄爲光祿大夫撰漢書注一卷

姚方興字馬王之注造尚書孔傳舜典一篇

田携之字僧紹爲宋平太守注周禮喪服



關康之世居京口以文義見稱徵通直郎不就顧悅之難王弼易義四十餘條康之申王難顧遠有情理又為毛詩義經籍疑滯多所論釋及造禮論十卷梁賀瑒為步兵較尉領五經博士著禮易老莊講論疏朝廷傳議數百篇賓禮儀注一百四十五卷議孝經義疏一卷五經異同論一卷伏曼容為臨海太守為周易毛詩喪服集解老莊論語義江遊為南平王大司馬府記室遊博學有思理更著論語孝經

常稜為治書御史著漢書續訓三卷

崔靈恩為國子博士先著左傳服解不為江東所行及改說杜義每文句嘗申服以難杜遂注左氏條義以明之時有助教虞僧誕又精杜學因作申杜難服以答靈恩世並行焉靈恩集注毛詩二十二卷集注周禮四十卷三禮義宗四十七卷左氏經傳義二十二卷左氏條例十卷公羊穀梁文義句十卷劉昭為豫章王中軍臨川記室初昭伯父彤集眾家晉書注于寶晉紀為四十卷至昭又集後漢同異以注



范曄書世稱博悉遷通直郎出為剡令卒官集注後漢一百八十卷

庾詵徵中書侍郎不赴著易林二十卷又著喪服儀文字體例老莊義疏注筭經及七曜歷

何喬為左氏尚書注周易十卷毛詩總義六卷毛詩隱義十卷禮記隱義二十卷禮答問五十五卷史不載官

范述曾為太中大夫注易文言

沈重字德厚為五經博士多所撰述咸得其指要行於世者周禮義三十一卷儀禮義二十五卷禮義三十卷毛詩義二十八卷喪服經義五卷周禮音一卷

儀禮音一卷禮記音一卷毛詩音二卷

孔子祜為步兵較尉著尚書義二十卷集注尚書三十卷續朱异集注周易一百卷續何承天集禮論一

百五十卷一云撰禮易詩

皇侃為國子助教撰禮記講疏五十卷及喪服義疏又撰論語義十卷孝經疏三卷

劉杳為尚書左丞撰楚詞草木疏一卷

陶弘景為奉朝請著孝經論語集注本草集注及注毛詩序一卷三禮目錄一卷注孝經一卷集解論語十卷



宋塞為中大夫注周易繫辭二卷

李玉之為臨沂令撰周易乾坤義一卷

南平王撰周易幾義一卷

褚仲都為五經博士撰周易講疏十六卷

蕭子政為都官尚書撰周易義疏十四卷繫辭義疏

三卷

薛圖和撰周易玄圖八卷

顏氏撰周易大演統一卷

劉叔嗣為五經博士注尚書下篇序 又云注尚書二十一卷

費魁為國子助教撰尚書義疏十卷

謝濟撰毛詩檢漏義二卷

何循之撰喪服經傳義疏一卷禮答問十卷

裴子野為中書侍郎撰喪服傳一卷

沈炫撰春秋五辯二卷

周捨為太子詹事撰禮疑義五十二卷

嚴植之為中撫軍記室參軍為五經博士注孝經一

卷

蕭子顯為吳興太守撰孝經義疏一卷又撰孝經受

敬義一卷

叔明為揚州從事文學太史撰孝經義一卷又集解



論語

劉被為太尉叅軍撰論語孔志十卷 述孔鮒 義疏

蕭子雲為國子祭酒注千字文一卷

鄒誕生為輕車錄事叅軍撰史記音五卷

常援為北中諮議叅軍撰漢書續訓二卷

杜弼注老子

沈旋約之子也為黃門侍郎集注莊子又注爾雅十卷

賀深為中軍宣成王長史撰三禮講疏五經滯義

許懋撰風雅比興義十五卷

周興嗣為給事中直西省左衛率周捨奉勅注高祖所製歷代賦啓興嗣助焉

後梁蔡太寶為中書監博覽群書學無不綜著尚書義疏三十卷

陳周弘正為尚書左僕射領國子祭酒所著周易講疏十六卷論語疏十一卷莊子疏八卷老子疏五卷孝經疏二卷行於世

王元規為尚書祠部郎入請為秦王東閣祭酒著春秋發題辭及義記十一卷續經典大義十四卷孝經義記二卷左傳音三卷禮音二卷



張譏為國子博士所撰周易義三十卷尚書義十五卷毛詩義二十卷孝經義八卷論語義二十卷老子義十一卷莊子內篇義十二卷外篇義二十卷雜篇義十卷玄部通義十二卷

姚察為吏部尚書入隋為太子內舍人著漢書訓纂三十卷漢書集解一卷定漢書疑二卷謝驕撰喪服義七卷并爾雅音

沈文阿為通直散騎嘗侍撰春秋左氏經傳義畧三十卷  
一云撰經典大義十八卷

徐孝克為散騎嘗侍入隋為國子博士撰孝經講疏

六卷論語句義五卷

臧兢撰漢書音訓三卷

施乾為博士撰爾雅音

顧野王為舍人撰爾雅音

戚衮為太學博士撰禮記義四十卷

後魏房景先孝文時為太學博士作五經疑問百餘篇又符璽郎王神貴答之名為辯疑合成十卷亦有可觀

辛子馥為尚書右丞以三傳經同說異遂總為一部傳注並出較比短長會亡未就



高允爲太嘗所製詮左氏釋毛詩拾遺論雜解議何  
鄭膏育事凡百餘篇

宋繪少勤學多所博覽好撰述依准裴松之注國志  
體注王隱及中興書

闕駟傳道經傳注王郎易傳學者籍以通經累官至  
姑臧太守

張湛燉煌人好學能屬文仕沮渠蒙遜爲黃門侍郎  
梁州平入國司徒崔浩識禮之浩注易叙曰國家西  
平河右燉煌張湛金城宋欽武威段承根三人皆儒  
者並有雋才見稱於西州每與餘論易餘以左氏傳

卦解之遂相勸爲注故因退朝之餘暇而爲之解焉  
其見稱如此

劉昫注周易韓子人物志黃石公三略並行於世後  
爲樂平王從事中郎

劉芳爲太嘗撰鄭玄所注周官儀禮音于寶所注周  
官音王肅所注尚書音何休所注公羊音范甯所注  
穀梁音韋昭所注國語音范曄注後漢書音各一卷  
辯類三卷徐州北人錄四十卷急就篇續注音義證  
三卷毛詩箋音義證十卷禮記義證十卷周官儀禮  
義證各五卷



奇博通墳籍嘗非馬融鄭玄解經失旨志在著述  
始注孝經論語頗傳於世爲縉紳所稱召赴京  
不得叙其論語注義多異鄭玄往往與司徒崔浩同  
嘗爽字仕明河內人置學館於溫水之右門徒七百  
餘人爽因教授之暇述六經略注以廣制作甚有條  
貫其序曰傳稱立天之道曰陰與陽立地之道曰柔  
與剛立人之道曰仁與義然則仁義者人之性也經  
典者人之文皆以陶鑄神情啓悟耳目未有不繇學  
而能成其器不繇習而能利其業是故季路勇士也  
服道以成患烈之槩寧越庸夫也講藝以全高尚之

節蓋所繇者習也所因者本也本立而道生身文而  
德備焉昔者先王之訓天下也莫不導以詩書教以  
禮樂移其風俗和其人民故恭儉莊敬而不煩者教  
深於禮也廣博易良而不奢者教深於樂也溫柔敦  
厚而不愚者教深於詩也疏通知遠而不誣者教深  
於書也縉靜精微而不賊者教深於易也屬辭比事  
而不亂者教深於春秋也夫樂以和神詩以正言禮  
以明體書以廣德春秋以斷事五者蓋五管之道相  
須而備而易爲之源故曰易不可見見則乾坤其幾  
乎息矣繇是言之六經者先王之遺烈聖人之盛事



也安可不遊心寓目習性文身哉頃因暇日屬意藝林略撰所聞討論其本名曰六經畧注以訓門徒焉其畧注行於世爽不仕號儒林先生

劉獻之博陵人徵典內較書以疾辭門徒數百皆通經之士時五經大義雖有師說而海內諸生多有疑滯咸決於獻之六藝之文雖不悉注然所撰宗旨頗異舊義撰三禮大義四卷三傳畧例三卷注毛詩序義一卷今行於世并章句疏三卷

李彪在秘書歲餘區分書體述春秋三傳十卷

酈道元爲御史中尉好學歷覽奇書撰注水經四十

卷本志十三篇

崔浩爲司徒注周易十卷注急就章二卷

元明進撰毛詩義府三卷

游肇爲國子博士爲易解

徐遵明華陰人東道大使元羅表薦之竟無禮辟遵

明撰春秋義章爲三十卷

北齊杜弼爲膠州刺史耽好玄理老而愈篤又注莊

子惠施篇易上下繫名新注義死竝行於世

李鉉爲國子博士撰定孝經論語毛詩三禮義疏及

三傳異同易義例合三十餘卷



權會為四門博士注易部行於世

後周樂遊為太學博士所撰孝經論語毛詩左傳春

秋序論十餘篇又著春秋序義通賈服說發杜氏微

文理竝有可觀

樊深為國子博士撰孝經喪服問疑各一卷又撰七

經異同說三卷義綱畧論并目錄三十卷竝行於世

熊安生為露門學博士下大夫所撰周禮義疏二十

卷禮記四十卷孝經義疏一卷竝行於世

蕭大園為滕王友入隋為西河郡守撰喪服儀注五

卷要訣二卷

隋宇文弼為尚書孝經注行於時

明克讓為太子率更令著孝經義疏一部

王頗撰五經大義三十卷

蕭該為國子博士撰漢書及文選音咸為當時所貴

張冲字叔玄初仕陳為左中郎將非其好也乃覃思

經典撰春秋義畧異於杜氏七十餘事喪服義三卷

孝經義三卷論語義十卷前漢音義十二卷官至漢

王侍讀

辛彥之為路州刺史撰五經異義一部

王孝藉開皇中召入秘書注尚書及詩遭亂零落



辛德源為著作郎王邵同脩國史德源每於務隙撰集注春秋三十卷注揚子法言二十卷

劉炫為大學博士以品卑去任著論語述議十卷春秋攻昧十卷五經正名十二卷孝經述議五卷春秋述議三十卷尚書述議二十卷毛詩述議四十卷又注詩譜二卷及注春秋左氏傳杜預序集解一卷褚輝為太學博士撰禮疏一百卷

顧彪為秘書學士明尚書春秋為古文尚書疏二十卷今文尚書音一卷大傳音一卷尚書文義一卷何妥為國子祭酒通直散騎嘗侍撰周易講疏三卷

孝經義疏二卷莊子疏四卷

唐魏徵為侍中徵以戴聖禮記論次不倫遂為類禮二十卷以類相從削其重複採先儒訓注擇善從之研精覃思數年而畢太宗覽而善之賜物一千段錄數本以賜太子及諸王仍藏之秘府

徐文遠為國子博士撰左傳義疏六十卷行於時

陸德明為國子博士撰老子疏十卷莊易疏各一十

五卷經典通釋三十卷並行於時

王玄度為較書郎貞觀十六年十月上其所注尚書毛詩周易并義決三卷與舊解尤別者一百九十餘



徐付學官詳其可否諸儒皆因習先師譏其穿鑿玄  
度隨方應答竟不肯屈太宗欲廣見聞竝納之秘府  
王方慶爲麟臺監精三禮好事者多詢訪之每所酬  
答咸有典據故時人編次名曰雜禮答問  
孔穎達爲國子祭酒太宗以儒學多門章句繁雜令  
穎達與諸儒撰正五經義疏一百七十卷數年乃成  
名曰義贊有詔改爲五經正義云雖復包括衆家稍  
爲詳悉然亦有紕繆

崔義玄少受章句之學五經大義先儒所疑有音訓  
不明者兼採衆家皆爲解釋傍引證據各有條流上  
聞之詔義玄討論五經正義與諸博士等詳定是非  
事竟不就後爲蒲州刺史卒

顏遊秦師古叔父也爲鄆州刺史卒官撰漢書決疑  
十二卷爲學者所稱後師古注漢書亦多取其義  
顏師古爲秘書少監太子承乾在東宮命師古注漢  
書承乾表上之太宗令編之秘閣  
許叔牙爲太子洗馬兼崇賢館學士嘗撰毛詩纂義  
十卷以進太子賜帛二百段兼令寫本付司經局其  
後御史大夫高智周謂人曰凡欲言詩者必須先讀  
此書始可也



格輔元兄希玄高宗時官至雒州司法叅軍章懷太子賢召令與洗馬劉訥言等注范曄後漢書行於世張太安高宗時爲太子左庶子太子賢令太安與洗馬劉訥言雒州司戶叅軍格希玄等注范曄後漢書表上之賜物三萬段仍以其書付秘閣

王勃高宗時爲虢州叅軍撰周易發五卷次論十卷王元感則天長安中爲四門博士表上其所撰尚書糾繆十卷春秋注滯二十卷禮記繩愆三十卷并所注孝經中記漢書草請官紙筆給寫秘閣制令弘文館崇賢兩館學士及成均博士詳其可不弘文館學

士祝欽明崇賢館學士李慮趙元亨成均博士郭山暉皆守先儒章句深譏元感摘據舊義元感隨方應答竟不之屈唯鳳閣舍人魏知古司封郎中徐堅左史劉知幾右史張思敬雅好異聞每爲元感申理其義由是擢拜太子司議郎加朝散大夫崇賢館學士常顛爲吏部侍郎著易蘊解推演潛元終始之義甚有與旨  
高定爲京兆叅軍幼聰警絕倫尤精王氏易嘗爲易圖合八出以畫八卦上圓下方合則重轉則演七轉而六十四卦六甲八節備焉著易外傳二十二卷



裴延齡為汜水尉乾元末過東都為賊所據因寓居於鄂州綴緝裴駟所注史記之闕遺自號小裴

韋公肅為秘書著作郎公肅注太宗文皇帝帝範一十二篇上獻有詔付集賢仍令別寫一本進內

崔玄暉為中書令撰行已要範十卷友義傳十卷義士傳十三卷訓注文館詞林策二十卷

李善寓居泚鄭問講文選為業所注文選十卷行於代後為崇賢館學士

韓滉為左僕射平章事好易象及春秋著春秋通例及天文事序議各一卷

張守節少集詩禮尤精史義注正義四十卷

張鎰撰三禮圖十二卷五經微旨十四卷孟子音義

三卷

李吉甫為相嘗討論易象異義附於僧一行集注之下

陸贄為給事中皇太子侍讀著集書春秋二十卷類禮二十卷君臣圖翼三十五卷並行於代

馮伉元和初為國子祭酒著三傳異同三卷

裴通為詹事著易玄解并總論二十卷易禦寇十三卷易洗心二十卷



冊府元龜 注釋二 卷之六

帝表微為翰林學士戶部侍郎少時尅苦自立著九經師授講一卷春秋三傳總例二十卷

李焘為相曾注解書傳之闕疑僅及百卷經巢讓之亂悉為灰燼焉

冊府元龜

淮南李嗣京叅閱

西極文翔鳳訂正

豫章黃國琦較釋

學較部 十一

譔集

太史公曰儒者六藝經傳以千萬數累世不能通其學當年不能究其理誠哉是言也自漢之後作者間出祖述不已踵武增華其文史之盛豈可遽數焉乃有博古之士好學不倦摭摭方策分別群類列其部

冊府元龜 學較部 卷之六



居成乎倫要俾肄業之儒開卷而獲益臨文之士泐波而達源至有承詔撰述篇籍咸叙備於萬乘之覽藏之秘室之府者又多乎哉原夫論次之意蓋將以撮樞要而遵簡易豈易所謂學以聚之傳所謂知類通達者歟

楚鐸椒為威王傳為王不能盡觀春秋采取成敗本四十餘章為鐸氏微

漢劉向成帝時為光祿大夫是時帝元舅陽平侯王鳳為大將軍秉政倚太后專國權兄弟七人皆封為列侯時數有灾異向以為外戚貴盛鳳兄弟用事之

咎而上方精於詩書觀古文詔向領校中五經秘書

言中者以別於外向見尚書洪範箕子為武王陳五行陰陽

休咎之應也休美也向乃集合上古以來歷春秋六國至

秦漢符瑞災異之記推迹行事連傳禍福著其占驗

比類相從各有條目凡十一篇號曰洪範五行傳論

奏之天子心知向忠精故為鳳兄弟起此論也然終

不能奪王氏之權向又睹俗彌奢淫而趙衛之屬起

微賤踰禮制趙皇后昭儀衛嬖好也向以為王教由內及外自

近者始故採取詩書所載賢妃貞婦興國顯家可法

則及孽嬖亂亡者孽庶也序次為烈女傳凡八篇以



戒天子及采傳記行事著新序說苑凡五十篇奏之  
 數上疏言得失陳法戒書數十上以助觀覽補遺闕  
 帝雖不能盡用然內嘉其言常嗟歎之  
 後漢應奉為司隸時並下諸官府郡國各上前人像  
 贊子劭乃連綴其名錄為狀人紀  
 景鸞廣漢梓潼人也取河洛圖緯以類相從名為災  
 集又撰禮內外記號曰禮略又抄風角雜書列其占  
 驗作興道一篇州郡辟命不就  
 荀爽集漢事成敗可以為鑒戒者謂之漢語位至司  
 空

魏文帝使諸儒撰集經傳隨類相從凡千餘篇號曰  
 皇覽

王象為散騎嘗侍受詔撰皇覽使象領秘書監象從  
 延康元年始撰集數歲成藏於秘府合四十餘部有

數十篇通合八百餘萬字

又云桓範為羽林左監劉劭為散騎侍郎並齋詔集

五經群書以類相從作皇覽

高堂隆撰魏臺雜訪議三卷位至光祿勳

吳張溫為太子傅撰三史略二十九卷

晉張華為司空著博物志十篇行於世

葛洪抄五經史漢百家之言方伎雜事三百一十卷



金匱藥方一百卷肘後要急方四卷後為句漏令  
環濟撰帝王要畧十二卷

郝嘉博通經籍張華重徵為儒林祭酒性和裕教訓  
不倦依孝經作二九神經

應詹撰東宮舊事三卷位至平南將軍江州刺史

宋范泰撰古今善言二十四篇位至侍中左光祿大  
夫

顧長康為散騎嘗侍何翌為長水校尉元徽初表上  
所撰諫林上自虞舜下及晉武凡十二卷

謝莊轉隋王誕後軍諮議並領記室分左氏經傳隨

國立篇製木方丈圖山川土地各有分理離之則州  
別郡殊合之則寓內為一元

何承天為御史大夫宋世禮論有八百卷承天再減  
并合以類相從凡為三百卷

南齊丘靈鞠為大中大夫製江左文章錄序起太興  
訖

元熙婁幼瑜著禮裙遺三十卷幼瑜教授不應徵辟  
陰顥撰瓊林二十卷

崔慰祖嘗著海岱志起太公迄西晉人物為四十卷  
半未成臨卒與從弟締書云海岱志良未周悉可寫



數本附護軍諸從人一通及友人任昉徐寅劉洋仕  
至始安王記室

梁庾詵撰晉朝雜事五卷抄八十卷普通中詔以爲  
黃門侍郎稱疾不起

阮孝緒撰高隱傳上自炎黃終於天監之末斟酌分  
爲三品凡十卷中篇所載一百三十七人劉敞劉訐  
覽其書曰昔嵇康所贊缺一自擬今四十之數將待  
吾等成耶對曰所謂荀君雖少後事當付鍾君若素  
卓白馬之日輒獲懸於二子敞訐果卒乃益二傳傳  
及孝緒亡訐兄潔錄其所遺行次篇末成絕筆之意

云孝緒天監十二年徵不至

張率爲司徒掾直文德侍詔省勅使抄一部書又撰  
婦人事二十餘條勒成百卷使工書人卿邪王深吳  
郡范懷約褚洵等繕寫以給後宮

張緬性愛墳籍聚書至萬餘卷抄後漢晉書衆家異  
同爲後漢衆紀四十卷晉抄三十卷又抄江左集未  
及成卒位至御史中丞

陸罩爲中大夫初簡文在雍州撰法寶聯璧罩與群  
賢並抄掇區分者數歲六年而書成命湘東王爲序  
其作者有侍中國子祭酒南蘭陵蕭子顯等三十人



以比王象劉劭之皇覽焉

徐勉撰左丞彈事五卷在選曹撰品五卷又以孔釋

二教殊途同歸撰會林五十卷皆行於世位至右光

祿大夫侍中衛將軍

吳均爲奉朝請勅撰通史起三皇訖齊代均草本記

二十卷

庾仲容抄諸子書三十卷烈女傳三卷位至黟縣令

陳陰僧仁爲征南諮議撰梁撮要三十卷

姚察著說林十卷位至吏部尙書

顧野王撰通史要畧一百卷位至黃門侍郎光祿卿

張譏爲國子博士兼東宮學士撰遊玄桂林二十四

卷後主嘗勅入就其家寫入秘閣

後魏道武天興四年十二月集博士儒生比衆經文

字義類相從凡四萬餘字號曰衆文經

淮王昌弟季爲尙書丞靈太后臨朝宦者干政季乃

總括古今名妃賢后凡爲四十卷奏之

嘗山王暉爲尙書左僕射暉雅好文學招集儒士崔

鴻等撰錄百家要事以類相從名爲科錄凡二百七

十卷上起伏羲迄於晉凡十四代暉表上之

王繼叔耽勤讀誦研綜經籍鉤深致遠多所博聞自



周以降暨於魏世帝王傳代之由貴臣升降之緒皆撰錄品第商畧是非號曰畧注合百餘篇好事者覽之咸以爲善焉

劉懋撰諸器物造作之始十五卷名曰物祖位至太尉司馬

張彛爲光祿大夫集庖犧至晉末凡十六代百十八帝歷三千二百七年雜事五百八十九合成五卷名曰帝圖歷

崔浩爲祭酒朝廷禮儀文策詔軍國書記盡關於浩浩能爲雅說不長屬文而留於制度科律及經術

之言作家祭法次序五宗蒸嘗之禮豐儉之節義理可觀

李謐涿郡人年十八詣太學受業後鳩集諸經廣較同異比三傳事例名春秋叢林十有二卷微拜著作佐郎辭以授弟郁

孫僧化識星分按文占以言災異爲通直散騎嘗侍永熙中出帝召僧化與中散大夫孫安都共撰兵法未就而帝入關遂罷

李公繪潛居自持雅好著書撰古今異說記二十八卷趙語三卷



北齊祖珽拜爲尙書左僕射監脩國史以後主屬文  
奏撰御覽武平三年二月詔珽及特進魏收等入文  
林館撰玄洲苑御覽後改名聖壽堂御覽八月御覽  
成勅付史閣後改爲脩文殿御覽凡三百六十卷初  
詔珽與收太子太師徐之才中書令崔劼散騎嘗侍  
張雕中書監楊休之監撰珽等奏追通直散騎侍郎  
常道孫陸又太子舍人王邵衛尉丞李孝基殿中侍  
御史魏澹中散大夫劉仲威袁爽國子博士朱才奉  
車都尉陸道閑考功郎中崔子樞左外兵郎薛道衡  
并省主客郎中盧思道司空東閣祭酒崔德太學博

士諸葛漢奉朝請鄭公超殿中侍御史鄭子信等入  
館撰書并勅蕭放蕭愨顏之推等同入撰例復令散  
騎嘗侍封孝琰前樂陵太守鄭元禮衛尉少卿杜臺  
卿通直散騎嘗侍王訓前兗州長史羊肅通直散騎  
侍郎馬元熙省三公郎中劉珉開府行參軍李師上  
溫君愨入館亦令撰書後命特進崔季舒前仁州刺  
史劉逖散騎嘗侍李孝貞中書侍郎李德林續入待  
詔尋又詔諸人各舉所知又有前濟州長史李翥前  
廣武太守魏寒前西兗州司馬蕭漑前幽州長史陸  
仁惠鄭州司馬江旰前通直散騎侍郎辛德源陸開



明通直郎封孝謇太尉掾張德冲并省右民高恭行  
司徒戶曹叅軍古道子前司空功曹叅軍劉顓獲嘉  
令崔德儒給事中李元楷晉州治中陽師孝太尉中  
兵叅軍盧公順司空中兵叅軍周子深開府行叅軍  
王友伯崔君洽魏師謇並入館侍詔又勅右僕射段  
孝言亦入御覽成後所撰錄人亦有不得侍詔付司  
處分者凡此諸人亦有文學庸淺附會親識妄相推  
薦者十三四焉雖然當時操筆之徒搜求畧盡其外  
如廣平宋孝王信都劉善經輩三數人論其才性入  
館諸賢亦十三四不逮之也侍詔文林亦是一時盛

事故存錄其姓名

荀士遜爲中書侍郎號爲稱職與李若等撰曲言行  
於世

隋陸爽字開明高祖受禪轉太子內直監尋遷太子  
洗馬與左庶子宇文愷等撰東宮典記七十卷

杜臺卿開皇初被徵入朝臺卿嘗採月令觸類而廣  
之爲書名玉燭寶典十二卷奏之賜絹二百疋位至  
著作郎

樂運南陽滎陽人嘗願爲一諫臣從容諷議而性許  
直爲人所排抵遂不被任用乃發憤錄夏殷以來諫



爭事集而部之凡六百三十九條合四十一卷名曰  
諫苑奏上之文帝覽而嘉焉位至毛州高唐令  
魏澹字彥深爲太子舍人廢太子勇深禮遇之屢加  
優錫令撰笑苑詞林集世稱其博物  
劉祐奉詔撰兵書十卷名曰金韜上善之  
崔順撰洽聞志七卷八代四科志三十卷位至越王  
長史

于仲爲光祿大夫撰畧覽三十卷

唐歐陽詢爲給事中武德七年奉詔與裴矩陳叔達  
趙弘智令狐德棻文學袁郎等十數人同脩藝文類

聚

李百藥初仕隋爲禮部員外郎皇太子勇召爲東宮  
學士令修五禮定律令撰陰陽書

魏徵爲秘書監貞觀五年撰群書政要奏之今採其  
序例以明述作之意曰竊維載籍之興其來尚矣左  
史右史記事記言皆所以昭德塞違勸善懲惡故作  
而可紀薰風揚乎百代動而不法明戒垂乎千祀是  
以歷觀前聖撫運膺期莫不懍乎馭朽自疆不息乾  
乾夕惕義在茲乎近古皇王時有撰述竝皆包括天  
地牢籠群有競採浮豔之詞爭馳迂誕之說騁末學



之傳聞師雕蟲之小伎流宕忘返殊途同致雖辯周  
萬物愈失司契之源術總百端彌乖得一之旨皇上  
以天縱之多才運生知之睿思性與道合動效機神  
玄德潛通化前王之所未化損已利物行列聖所不  
能行瀚海龍庭之野並爲郡國扶桑若木之域咸襲  
纓冕天地成平外內禔福猶且爲而不恃雖休勿休  
俯協堯舜式遵稽古不察貌乎止水將取鑒乎哲人  
以爲六籍紛綸百家踏駁窮理盡性則勞而少功周  
覽汎觀則博而寡要故爰命臣等採摭群書剪截浮  
故光昭訓典聖思所存務乎政術綴叙大畧咸發神

秉雅致鈎深規摹宏遠網羅政體事非一日若乃飲  
明之后屈已以救時無道之君樂身以亡國或臨難  
知懼在危而獲安或得志而驕居成以致敗者莫不  
備其得失以立功樹惠貞心直道忘軀殉國身殞百  
年之中聲馳千載之後或大奸巨猾轉日迴天社鼠  
城狐反白作黑忠良由其放逐邦國因以危亡者咸  
亦述其終始以顯爲臣不易其立德立言作訓垂範  
爲綱爲紀經天緯地金聲玉振騰實飛英雅論徽猷  
嘉言美事可以弘獎名教崇太平之基者固亦片善  
不遺將以丕顯皇極至於母儀嬪則懿后良妃叅徽



猷於十亂著深誠於辭輦或傾城哲婦亡國豔妻候  
晨雞以先鳴待舉烽而後笑者時有所存以備勸戒  
自六經訖于諸子始五帝下盡晉年凡爲五秩合五  
十卷本求政要故以政要爲名但皇覽遍畧隨方類  
聚名目互顯首尾淆亂文義斷絕尋究爲難今之所  
撰異乎先作總立新名各全舊體欲見本知末原始  
要終並棄彼春華採茲秋實一書之內牙角無遺一  
事之中羽毛咸盡用之當今足以殷鑒前古傳之來  
葉可以貽厥孫謀引而伸之觸類而長蓋亦言之者  
無罪聞之者足以自戒庶弘茲九德簡而易從觀彼

百王不疾而速崇巍巍之盛葉開蕩蕩之王道可久  
可大之功竝天地之貞觀日用日新之德將金鏡以  
長懸矣太宗覽之稱善勅皇太子諸王各傳一本賜  
徵帛二百疋又徵爲特進以禮經遭秦滅學戴聖編  
錄條疏不次乃刪其所記以類相從爲五十篇合二  
十卷名類禮太宗善之賜物一千段以其書藏秘府  
及賜皇太子諸王

李襲譽爲揚州總管長史撰忠孝圖二十卷貞觀十  
三年十一月奏之太宗覽而稱善

高士廉爲尚書左僕射貞觀十五年撰文思博要一



千二百卷上之有詔藏之秘府

時大學博士馬嘉運大嘗丞呂卞同脩

高智周為秘書郎弘文直學士預撰瑤山玉彩文館

詞林三遷蘭臺大夫

李敬玄撰正論三卷位至揚州大都府長史杜正倫

為中書侍郎兼左庶子撰春坊要錄四卷

許敬宗為弘文館學士永徽中與李義府等奉勅於

內殿撰東殿新書二百卷高宗自製序其書自史記

至晉書刪其繁詞勒成藏之書府

元萬頃上元中為著作郎則天廣召文詞之士入禁

中脩撰萬頃與左史劉禕之范履冰苗神客右史周

思茂胡楚賓等咸預其選前後撰列女傳以執百審  
新誠樂書凡千餘卷

姚璿永徽中為太子宮門郎博涉經史有才辯與司

議郎孟利貞等奉令脩瑤山玉彩書成遷秘書郎

張昌宗為麟臺監聖曆中則天以御覽及文思博要

等書多未周備令昌宗與麟臺少監李嶠廣召文學

之士給事中徐彥伯水部郎中員半千等二十六人

增損文思博要勒成一千三百卷於舊書外更加佛

教道教及親屬姓氏方域等部至是畢功帝親製名

曰三教珠英時左補闕崔湜同脩



常叔夏神龍中爲國子祭酒撰三禮要記三十卷行於代

王方慶撰宮卿故事一卷位至太子左庶子

徐堅爲集賢院學士開元中勅堅等纂經史要事及歷代文章以類相從欲令皇子簡事綴文帝自定名爲初學記是日撰成以獻帝稱善賜堅等絹三百疋張九齡爲中書令開元二十七年二月九齡等撰六典三十卷成上之

歸崇敬爲國子司業大曆中與諸儒官同脩通志崇敬知禮儀志衆稱允

裴澄爲國子司業貞元十二年表上乘輿月令十二卷

蘇冕爲京兆府士曹續國朝政事撰會要四十卷

杜祐爲淮南節度使貞元十七年獻通典表曰臣聞太上立德不可庶幾其次立功道行當代其次立言見志後學由是往哲遞相祖述將施有政用之邦家臣本以門資幼登官序仕非遊藝才不及人徒懷自疆頗翫墳籍雖履歷叨幸或職劇務繁竊惜光陰未嘗輟廢夫孝經尙書毛詩周易三傳皆父子君臣之要道十倫五教之宏綱如日月之下臨天地之大德



百王是式終古攸遵然率多記言罕存法制愚管窺  
蠡測豈達高深輒肆荒唐誠爲臆度每念憎學冀深  
政經畧觀歷代衆賢著論多陳紊失之弊或闕拯救  
之方臣旣庸淺寧詳損益未原其始莫暢其終尚賴  
周氏典禮秦皇蕩滅不盡從有繁雜且用準憑至于  
往昔是非可爲來今龜鑑布在方策亦麤研尋自頃  
纂脩平言涉三紀識寡思拙心昧詞蕪圖籍實多事  
自非少將謂功畢有愧乖疎固不足發揮大猷但微  
臣竭愚盡慮凡二百卷不敢不具獻上庶明鄙志所  
之塵瀆聖聰兢惶無措其書凡九門叙食貨十二卷

選舉六卷職官二十二卷禮一百卷樂七卷兵六卷

刑十七卷州郡十四卷邊防十六卷

賀蘭正元貞元中爲昭義軍節度使判官進用人權  
衡輔佐記各十卷舉選衡鏡三卷

馬總爲天平軍節度使總理道素優軍政多暇公務  
之餘手不釋卷所著奏議集年歷通歷子欽等書百  
餘卷行於世

唐次爲禮部員外郎貞元八年坐竇叅出爲開州刺  
史在巴峽間十餘年不獲進用西川節度使韋臯抗  
表請爲副使德宗密諭臯令罷之次久滯蠻荒孤心



抑鬱怨謗所積孰與申明乃採自古忠臣賢士遭羅  
讒謗放逐遂至殺身而君猶不悟其書三篇謂之辯  
謗畧上之德宗省之猶怒謂左右曰唐次乃方吾爲  
古之昏主何自論如此改夔州刺史及憲宗卽位與  
李吉甫同自峽內召還授次禮部郎中尋以本官知  
制誥正拜中書舍人卒憲宗明哲嫉惡尤惡人朋比  
傾陷嘗閱書禁中得次所上書三篇賢而善之謂學  
士沈傳師曰唐次所集辯謗之書實君人者時宜觀  
覽朕思古書中多有此事次篇錄未盡卿家傳史學  
可與學士類例廣之傳師奉詔與令狐楚杜元穎等

分功脩續廣爲十卷號元和辯謗畧優詔答之

憲宗元和八年六月詔宰臣武元衡李吉甫李絳及  
舊相太子少傅判太嘗卿鄭餘慶禮部尚書權德輿  
各進舊書

張正甫爲集賢殿學士右散騎嘗侍寶歷二年進藝  
文類聚一百卷

令狐楚爲翰林學士憲宗以自古賢臣多受讒謗以  
至危亡因詔楚纂集歷代名臣受謗者爲十卷名爲  
元和辯謗畧書成帝嘉其該博

李渤爲著作佐郎罷官閑居東雒撰禦戎新錄二十



卷以獻

常處厚穆宗時與路隨爲翰林侍讀學士長慶二年處厚與隨撰六經法言二十卷書成表獻之日臣聞三皇講道五帝講德三王講仁五霸講義所講不同同歸於理理道之極備於六經雖質文相變忠敬交用損益因時步驟不一然而釋三綱越五嘗而致雍熙者未之有也自秦火蕩蕪孔壁穿蠹曲學異辯專門多惑營道之軌並馳希聖之堂蓋寡蕪文錯起浮義互生簡冊混散篇卷繁積勞神於累代弊形於當年其知愈博其得愈少夫然通方之士達識之儒且

猶不爲也況南面之尊司道之契豈不貪其精而遺其蘊者乎伏惟文武孝德皇帝陛下精義神授博識天資山峻詞峯泉蓄學海膺休運則混六合而不讓思屈已則舞兩階而不疑故當希皇踵帝肩王轍霸可以區區近躅擬於聖德哉臣處厚臣隨採合易詩書左氏春秋孝經等因其本篇掇其精粹論紀先師微旨今亦附於篇末總題曰六經法言合二十卷獻上取諸身必本於五事通諸物兼暢於三才始九族已及於百姓刑室家以儀於天下聖君良主之往行哲人壯士之前言天人相與之際幽明交感之應窮



理盡性之辯藥石攻磨之規堯舜禹湯文武理亂之道盡在君臣父子夫婦朋友之義必舉其興可以觀勸其違可以戒此其所存者也至如爻象錯綜陰陽難名比興箴誨幽隱難釋誥命訓論古今不合威儀顛制命諸有司褒貶揚摧歸諸史法此其所遺者也商鞅之說秦主歎帝道之難行太宗之納魏徵流王澤而廣被繇是言之道無遠近德無重輕能者挈之如毛羽不能者舉之如嵩岱今逢希代之君當難合之運故不能以百家邪說六國縱橫秦漢刑名魏晉倫薄爲盛時道歷代帝王皆務纂集魏稱皇覽梁著

進畧鄴中則有脩文之作江左則有壽光之書但諛術於聞見非垂謀於理本臣今所貴實異斯作陸賈奏甚卑之論尙稱善於高皇方朔獻雜糅之說猶見知於武帝伏惟陛下機務之餘燕息之暇時降省覽天下幸甚帝覽其書稱善者久之賜處厚隨錦綵二百疋銀器二事

崔駰爲翰林侍講學士寶曆元年七月與高重進纂要集十卷各賜綵錦二百疋銀器五事  
魏謩嘗鈔撮子書要言以類相從二十卷號曰魏氏手畧有文集十卷位至太子少保



裴潏文宗時爲右散騎嘗侍太和八年集歷代文章自梁昭明太子著文選外合於典雅者古今通選勒成二十卷口爲太和通選并意義目錄一卷進上潏之所著偏僻時論以爲不當

王涯爲平章事太和八年進月令圖一軸

兵部尚書王起進自古帝王五位圖帝欲置於機案以便觀覽宣付起重以長卷寫進

許康佐爲翰林學士太和九年進纂集左氏傳三十卷

高重爲國子祭酒太和九年進春和纂集四十卷

鄭澹爲翰林侍講學士文宗命撰經史要錄十二卷書成帝嘉其精博因以十九書語類帝親自發問澹應對無滯錫以金紫

姚康爲太子詹事大中五年十一月以所撰統史三百卷上之統史自開闢至隋末編年纂帝王美政善事詔令可利於時者至於時政鹽鐵筦權和糴賑貸錢陌兵數虛實貯糧用兵利害邊事戎狄無不備載下至釋道燒煉妄求無驗皆載之

崔鉉爲左僕射平章事大順七年十月鉉上續會要四十卷脩撰官楊紹復崔瑒薛逢鄭言等賜物有差



梁末帝貞明末前衡州長史劉騰進所撰地里手鏡  
十卷

晉曹國珍爲左諫議大夫天福四年上言請於內外  
臣寮之中選才畧之士聚唐六典前後會要禮閣新  
儀大中統類律令格式等精詳纂集俾無漏畧別爲  
書一部目爲大晉政統從之其詳議官宜差太子少  
師梁文矩散騎常侍張允大理卿張澄國子祭酒唐  
納大理少卿高鴻漸國子司業田敏禮部郎中呂咸  
休司勳員外郎劉濤刑部員外郎李知損監察御史  
郭延升等一十人充文矩等咸日改前代禮樂刑憲

爲大晉政統則堯典舜典當以晉典革名列狀駁之  
曰作者之謂聖述者之謂明苟非聖明焉能述作若  
運因革故則事乃維新或改正朔而褒犧牲或易服  
色而殊徽號是以五帝殊時不相沿襲三王異世不  
相襲禮至於近代率繇舊章比及前朝是滋其目多  
因行事之失改爲立制之初或臣奏條章君行可否  
皆表其年月紀以姓名聚類分門成文作則莫不悉  
稽前典垂範後昆述言聖賢歷於朝代得金科玉條  
之號設亂言破律之防守而行之其來尙矣皇帝陛  
下運齊七政歷契千年爰從創業開基莫不積功累



德行宜直筆具載鴻猷若備錄前代之編年目作聖朝之政統此則是名不正也夫名不正則言不順而媚時掠美非其實矣若剪裁其詞此則是文不備也夫文不備則啓爭端而禮樂刑政於斯亂矣若改舊條而爲新制則未審何門可以刊削何事可以編聯既當革故從新又須廢彼行此則未知國朝能守而不失乎臣等同其參詳未見其可疏奏嘉之其事遂寢

張昭爲兵部尙書世宗親征淮南未進所撰兵法其畧曰臣本書生不閑武藝空忝穰苴之位慙無郟穀之能遽捧綸言令纂兵法雖疆三宮之說何稱九天之謀伏惟陛下玉斗纘戎金樓聚學九舜十堯之典不足揣摩三門五將之書無煩接要而猶申旦不寐乙夜縱觀留連於尺籍伍符探賸於楓天棗地以爲人情貴耳而賤目儒者是古而非今以韓白之智有餘英衛之才不足寧悞滋水釣翁之學今迺推輪圯橋神叟之言已爲糟粕無足師模於鈐筭聊可挹酌於源流爰命下臣撮其樞要臣逃觀前代兵家所著篇部頗多自唐末亂離圖書流落今蘭臺秘府目錄空存其於討論固難詳悉今祇據臣家所有之書據



其兵要自軍旅制置選練教習安營結陣命將出師  
詭譎機權形勢利害賞罰告誓攻守巧拙星氣風角  
陰陽課式等都四十二門離爲十卷管窺蠡測莫知  
穹渤之高深獸走犬馳且副蒐苗之指使旣成卷部  
須有籤題臣伏見前代奉詔撰論皆目爲制旨今輒  
準故事題爲制旨兵法臣留司都下不敢輒去班行  
謹差私吏齎詣行闕陳進詔曰朕昔覽兵書麤知前  
事將觀機要委卿撰述曾未踰時遠來呈進披尋之  
際備見精詳論戰法之大綱與孫吳而其貫賴卿博  
學副朕所懷宐示頒宣用明恩寵嘉獎在念再三不

忘今賜卿衣着二百疋銀器一百兩



